

Letsatsi la Lefatshe la Puisetsogodimo le Nal'ibali




Mainane a maatla! *Motsotso wa bofelo*, le kwadilwe ke mokwadi yo o fentseng kabo, Zukiswa Wanner, le go tshwantshiwa ke mothadi wa dikhathunu yo o tumileng wa mo Aforikaborwa, e bong Rico. Le buisitse bana ba o tshelang le bona ka Letsatsi la Lefatshe la Puisetsogodimo, la 1 Tlhakole 2018.



Ditiro tse 5 tsa Letsatsi la Lefatshe la Puisetsogodimo

1. Buisetsa bana ba gago le ba bangwe leinane, *Motsotso wa bofelo*, mo ditsebeng 2 le 3. Ikatsetse go buisetsa kwa godimo makgetlho a le mmalwa pele o le buisetsa bana mme o gakologelwe go dirisa tlhagisomaikutlo e ntsi mo lentsweng la gago fa o buisa.
2. Pele o buisa leinane, botsa bana gore a ba kile ba tshameka kgwele ya dinao mo nakong e e fetileng, gore a ba kile ba ya go lebelela motshameko wa kgwele ya dinao o tshameka kgotsa a ba kile ba o bona o tshameka mo TV. Ba rotloetse go arolelana maitemogelo a bone le wena.
3. Morago ga go buisa leinane, rotloetsa bana go le tlhalosa ka go ba kopa go thala kgotsa go taka setshwantsho sa karolo ya bone e ba e ratang.
4. Rulaganya Moso-wa-go-Kopana-le-Leinane ka Letsatsi la Lefatshe la Puisetsogodimo kgotsa ka bofelo jwa beke. Laletsa bana go tsenela le batsadi ba bone. Ba itsise dibuka tsofhe tse o itseng gore di na le mainane a a siametseng puisetsogodimo ka go ba a buisetsa go tswa mo dibukeng tseo.
5. Itirele diphousetara tsa Letsatsi la Lefatshe la Puisetsogodimo la 2018 go tlhola temoso ka ga bothlokwa jwa letsatsi le. Mmogo le bana, segolola ditlhaka le ditshwantsho go tswa mo dimakasineng le mo makwalodikgannyeng, thala ditshwantsho, kwala mafoko a gago le dipolelo, mme o dirise ditshwantsho go tswa mo webosaeteng ya Nal'ibali (tsena mo "Story supplies" mo www.nalibali.org). Itirele meono ya gago, kgotsa o dirise ya rona – Arolelana leinane gompieno!



Mesola e 8 ya go buisetsa kwa godimo

Go buisetsa bana ba gago kwa godimo:

- go ba bontsha gore o sologela dibuka le go buisa molemo.
- go go neela dilo tse le ka buang ka tsona mmogo.
- go aga kgolagano fa gare ga lona.
- go ba neela tšhono ya go itemogela puiso jaaka tiro e e kgotsofatsang.
- go ba rotloetsa go ithuta go ipuisetsa le go tswelela go buisa morago ga moo.
- go ba bontsha gore re buisa jang le gore dibuka di dira jang.
- go ba neela tšhono ya go itumelela mainane a a kwa godingwana ga bokgoni jwa bone jwa ga jaana jwa puiso.
- go aga le go tsweletsa tlotlofoko ya bone le bokgoni jwa puo.



O ka tsaya karolo jang

Etela www.nalibali.org kgotsa www.nalibali.mobi go kwadisa balelapa la gago, tlelapo ya puiso kgotsa sekolo mme o thuse ka go dira se tiragalo e kgolokgolo ya Letsatsi la Lefatshe la Puisetsogodimo mo Aforikaborwa!

Motsotso wa bofelo

Leinane ka Zukiswa Wanner

Ditshwantsho ka Rico

Thanolo ka Opelo Thole

"Ke tlike go nosa dino tse pedi gompieno, Papa," go ne ga rialo Neo fa a ne a rwala ditlhako tsa gagwe tsa go tshameka kgwele ya dinao.

"Mme ke tlaa thusa ka go nosa dino tse tharo mo godimo ga tseo, Malome," go ne ga rialo Priya yo o neng a sa tswa go goroga kwa gaabo Neo a na le monnawe, e bong Rahul. Rahul o ne a tshwere vuvuzela ya gagwe ya mmala wa bohobidulo jo bo phatsimang.

Ragwe Neo o ne a tshega. "Go siame, ka jalo ke solofela go duduetsa gatlhano!"

"Le nna, Malome! A le nna nka duduetsa?" go ne ga botsa Rahul.

"Go ntse jalo, mosimane wa me," go ne ga rialo rragwe Neo fa a thusa Mbali go rwala ditlhako tsa gagwe. "Jaanong, a re yeng!"

Ba ne ba tsena botlhe mo koloing. Neo o ne a dula fa pele. O ne a kile a dula foo makgetlho a le mantsi mo nakong e e fetileng. O ne a na le bonnete jwa gore fa rragwe a ne a ka mo letlelela, fa maoto a gagwe a nna maleele mo go lekaneng, o ne a ka kgona go kgweetsa kolo. Go ne go lebega go le bonolo. Rahul le Priya ba ne ba dula mongwe le mongwe mo matlhakoreng a ga Mbali. Ba ne ba mo tsikitla mme o ne a tshegatshega.


Pele ga go ka itsiwe, ba ne ba le kwa lebaleng la kgwele ya dinao. Ba ne ba gorogile ka nako mme Priya le Neo ba ne ba ya go kopana le batshamekammogo go tswa kwa Maqhawe Football Club gore ba ikatise le go ithuthafatsa pele ga motshameko. Gompieno ba ne ba tshameka kगतlhanoing le Diamond Football Club.



"Gakologelwa go netefatsa go timola phatsimo ya Diamond tseo thata mo e leng gore, morago ga motshameko ba tlaa tshwanela go fetola leina la bone go nna Coal Football Club," go ne ga rialo mokatise wa bone.

Jaanong e ne e le nako ya gore batshameki ba tabogele mo lebaleng. Molaolamotshameko o ne a letsa phala ya gagwe mme motshameko o ne wa simolola.

Dilo di ne tsa simolola ka iketlo, mme ka bonako di ne tsa akofanyana. Go ne go na le modumo o montsi fa bamalapa a bana mo ditlhopheng ka bobedi ba duduetsa. Kgwele e ne e nna mo letlhakoreng la lebala nakwana, mme fela fa e ne e kete ba tlike go e sutisetsa mo halofong e nngwe, mongwe le mongwe wa batshameki bao o ne a utswa kgwele! Motshameko o ne wa tswelela jaana go fitlhelela ka nako ya halofo.



"Ke boregile! O solofeditse gore o tlike go nosa dino," Rahul o ne a raya Neo le Priya fa ba tla mo meleng e e mo matlhakoreng.

"Ee. Mbali o ne a batla dino, Mbali o batla dino," go ne ga boeletsa Mbali. "Mbali o a otsela," o ne a tlatse ka go edimola. Neo le Priya ba ne ba tshega fela le go taboga ba boela kwa batshamekammogong.



Arolelana leinane gompieno!

Phala e ne ya lela mme batshameki ba ne ba tabogela mo lebaleng go tsenela halofo ya bobedi. Motshameko o ne wa tswelela ka tsela e e tshwanang le ya mo halofong ya ntlha ... go fitlhelela fa go setse motsotso o le mongwe fela!

Neo o ne a tshwere kgwele.

O ne a lebaleba go bona gore a go na le mongwe go tswa mo setlhopheng sa Diamond Football Club gaufi le ene. Nnyaa, o ne a le nosi. O ne a tabogela kwa pele, a ragaraga kgwele. Ka ponyo ya leitlho motshameki wa Diamond Football Club o ne a tlhagelela.

Neo o ne

a mo leba ka tlhamalalo mo matlhong fa a ragela kgwele fa gare ga maoto a motshameki yo mongwe. Balebeledi ba ne ba goeletsa ka boitumelo.

Motshameki yo mongwe wa Diamond Football Club o ne a ela kwa ntlheng ya ga Neo go mo tlasela. Ka bonako, Neo o ne a fetisetsa kgwele kwa go Priya.

Batho botlhe ba ne ba tshwere pelo ka letsogo fa Priya a tsaya kgwele le go e raga thata. *LADUMA!* Motshwaradino wa Diamond o ne a sa bona kgwele e tla! Priya o ne a nositse nno.



Mme ga go a feta le fa e le motsotswana. Fela fa a re o a retologa go keteka nno ka go bina, molaolamotshameko o ne a letsa phala ya bofelo! Maqhawe Football Club ba ne ba fentse motshameko!

Neo o ne a itumetse moo o neng a tabogela kwa go Priya le go mo tsholetsa!



Ba ne mmogo ba tabogela kwa batshamekammogong le kwa mokatsing kwa letlhakoreng la lebala, mme botlhe ba ne ba inama. Morago Priya le Neo ba ne ba itlhaganela kwa go rragwe Neo. Rahul o ne a leletsa vuvuzela ya gagwe kwa godimo.

"E ke tiragatso e e dirang gore batho ba tshwanele go ja aesekeherime, Priya le Neo," go ne ga rialo rragwe Neo. "A bagale ba babedi ba rona ba ka rata seo?"

"Ee! Re rata aesekeherime," Mbali o ne a ba arabela. Botlhe ba ne ba tshega.

Neo o ne a tsholetsa Mbali le go mo kuka fa ba ya go reka aesekeherime. A ka tswa a sa nosa dino tse pedi tse o neng a batlile go di nosa, mme fela o ne a thusitse tsala ya gagwe ya tlhogo ya kgomo go nosa nno ya phenyo! Mme Priya ene? O ne a itumetse gonne e ne e le nno ya gagwe ya ntlhantlha ya Maqhawe Football Club. Modumo wa vuvuzela ya ga Rahul e ne e kete ke mmimo o o monate o o tshamekelwang ene fela.





Dira betšhe!

1. Sega mo moleng o o nang le maronho a mahibidu go segolola betšhe.
2. Tshasa setshwantsho ka mmala.
3. Sega sediko sa bogolo jo bo tshwanang le jwa betšhe go tswa mo khatebotong e tshesane, sekai, lebokoso la siriele.
4. Dirisa sekgomaretsi go kgomaretsa betšhe mo khatebotong.
5. Dirisa theipi e e kgomaretsang go mametlelela sepelete mo morago ga betšhe. Kgotsa dira leroba kwa godimo mme o tsenye wulu kgotsa mogala mo go lona gore o kgone go e bofelela mo thamong ya gago.
6. Natefelwa ke go apara betšhe ya gago fa o buisa le go reetsa dinaane ka ga Letsatsi la Lefatshe la Puišetsogodimo.

Re romelele ditshwantsho tsa bana ba gago ba tsentse dibetšhe tsa bone tsa Letsatsi la Lefatshe la Puišetsogodimo. Di romele ka imeile mo go info@nalibali.org kgotsa di arogane le ba bangwe mo tsebeng ya rona ya Facebook!

Ka ga Nal'ibali

Nal'ibali (lefoko la isiXhosa le le rayang gore "leinane ke leno") ke letsholo la bosesetšhaba la go buisetsa boithabiso. E batla go tlotlheletsa le go tthomamisa mokgwatlwaelo wa go buisa go ralala Aforikaborwa, gore go buisa, go kwala le go arogana mainane – ka dipuo tsothle tsa Aforikaborwa – e nne karolo ya botshelo jwa letsatsi le letsatsi.



Bana ba ba nnang mo tikologong ya dikwalo le mo mainaneng a a monate ka dipuo tse ba di tlhaloganyang, ba nna le kgatlhego e ntsi ya go itse, ba nna le boitshepo mme

ba tlhotlheletsega go ithuta. Go na le kgonagalo e ntsi ya gore ba ka nna babuisi, le go dira sentle kwa sekolong mo dirutweng tsothle. Mainane a aga tlotlofoko, a maatlafatsa kgakologelo mme a godisa dikgopolo tsa bana.

Fa e sale go tloga ka 2012, Nal'ibali e dirile le balekane ba ba farologaneng ba puso, baagi le kgwebo go netefatsa gore ngwana mongwe le mongwe wa Aforikaborwa o na le ditšhono tsa go rata dibuka le mainane. Balekane ba rona ba re simolotseng le bone ba akaretsa: DG Murry Trust, PRAESA (Project for the Study of Alternative Education in South Africa) le Tiso Blackstar (e mo malobeng e ne e le, Times Media). Ka kemonokeng, katiso le dimatheriale tsa boleng jo bo kwa godimo tsa puiso, Nal'ibali e thusa ka go godisa setšhaba sa babuisi.

Nal'ibali e fano go go rotloetsa le go go tshegetsatsa. **Ikgolaganye le rona ka go leletsatsa lefelo la rona la thuso ya badirisi mo go 02 11 80 40 80**, kgotsa ka nngwe ya ditsela tse: